

欽定天文正義

欽定天文正義卷七十五

風占考

# 風占考

春秋釐公十六年正月六鵠退蜚過宋都左氏傳曰風也

漢文帝二年六月淮南王都壽春大風毀民室殺人時淮南王破南越後遂謀逆帝赦之遣蜀道死五年吳暴風雨壞城官府民室時吳王濞謀為逆亂後卒誅滅十月楚王都彭城大風從東南來毀市門殺人時王戊初嗣位後坐淫削國與吳王謀反誅

武帝元光五年秋七月大風拔木 征和二年夏四月大風發屋折木

昭帝元鳳元年燕王都薊大風雨拔宮中樹七圍以上十六枚

壞城樓後燕王旦謀反發覺誅

元帝建始元年十二月大風拔甘泉時中大木十圍以上

王莽天鳳元年七月大風拔木飛北闕直城屋瓦地皇元年

七月大風毀王路堂更始元年六月光武破王尋王邑兵

於昆陽大雷風屋瓦皆飛

後漢和帝永元五年五月戊寅南陽大風拔樹木

安帝永初元年大風拔樹二年六月京師及郡國四十大風

拔木三年五月癸酉京都大風拔南郊道梓樹九十六枚

七年八月丙寅京都大風拔樹元初二年二月癸亥京

都大風拔樹六年夏四月沛國勃海大風拔樹三萬餘枚

延光二年三月丙申河東潁川大風拔樹六月壬午郡國  
十一大風拔樹三年京都及郡國三十六大風拔樹

靈帝建寧二年四月癸巳京都大風雨雹拔郊道樹十一園已  
上百餘枚中平五年六月丙寅大風拔樹

獻帝初平四年六月乙未大風發屋拔木

魏齊王正始九年十一月大風數十日發屋折樹十二月戊午

晦尤甚嘉平元年正月壬辰朔西北大風發屋折樹木昏

塵蔽天按管輅說此為時刑大風執政之憂也後踰旬而曹

爽誅滅

吳孫權太平元年八月朔大風江海涌溢平地水深八尺拔南

陵樹二千株石碑蹉動吳城兩門飛落

孫亮建興元年十二月甲申大風震電是時魏遣大眾三道來攻諸葛恪破其東興軍二軍亦退明年恪又攻新城喪衆大半還伏誅

孫休永安元年十一月甲午風四轉五復蒙霧連日是時孫綝一門五侯權逼吳王風霧之災與漢五侯丁傅同應也十二月丁卯夜有大風發木揚沙明日綝誅

晉武帝泰始五年五月辛卯朔廣平大風折木咸寧元年五月下邳廣陵大風壞千餘家折樹木其月甲申廣陵司吾下邳大風拔木二年八月河間大風折木太康二年五月

濟南暴風折木傷麥六月高平大風折木發壞邸閣四十四  
區七月上黨又大風傷秋稼 八年六月郡國八大風 九  
年正月京都風雹發屋拔樹

惠帝元康四年六月大風雨拔樹 五年四月庚寅暴風城東

渠波浪殺人七月下邳大風壞廬舍九月鴈門新興太原上

黨災風傷稼明年氏羗反叛大兵西討 九年六月颶風吹

賈謐朝服飛數百丈明年謐誅十二月甲子朔京都連大風

發屋折木十二月愍懷太子廢幽於許昌 永康元年二月

大風拔木三月愍懷被害己卯喪柩發許昌還洛是日又大

風雷電幃蓋飛裂四月張華第舍颶風起折木飛繒折軸六

七月華遇害十一月戊午朔大風從西北來折木飛沙石  
六日止 永寧元年八月郡國三大風 永興元年正月乙  
丑西北大風

元帝永昌元年七月丙寅大風拔木屋瓦皆飛八月暴風壞屋  
拔御道柳樹百餘株其風縱橫無常若風自八方來者是時  
王敦專權害尚書令刁協僕射周顗等故風縱橫若非一處  
也

成帝咸康四年三月壬辰成都大風發屋折木四月李壽襲殺  
李期自立

康帝建元元年七月庚寅晉陵吳郡災風



穆帝升平元年八月丁未策立皇后何氏是日疾風五年正月

戊午朔疾風

海西公太和六年二月大風迅急

孝武帝寧康元年三月京都大風火大起三年三月戊申朔

暴風迅起從丑上來須臾迭轉從子上來飛沙揚礫太元

二年二月乙丑朔暴風折木閏三月甲子朔暴風疾雨俱至

發屋折木三年六月長安大風拔符堅宮中樹其後堅再

南伐遂有肥水之敗四年八月乙未暴風揚沙石十二

年正月壬午夜暴風七月甲辰大風折木十三年十二月

己未大風晝晦 十七年六月乙未大風折木

安帝元興二年二月夜大風雨大航門屋瓦飛落 三年正月

桓元出遊大航南風飄其輶輓蓋經三月而元敗歸江陵五

月江陵又大風折木是月桓元敗於崢嶸洲身亦屠裂十一

月丁酉大風江陵多死者 義熙四年十一月辛卯朔西北

疾風起 五年閏十一月丁亥大風發屋明年盧循至蔡州

六年五月壬申大風拔北郊樹并吹琅邪揚州二射堂倒

壞是日盧循大艦漂沒甲戌又風發屋折木是冬王師南討

九年正月大風白馬寺浮圖剝柱折壞 十年四月己丑

朔大風拔木六月辛亥大風拔木七月淮北大風壞屋舍明

年西討司馬休之應

宋文帝元嘉二十九年三月壬午大風拔木

齊武帝永明四年二月丙寅大風吳興偏甚樹葉皆赤八年

六月乙酉都下大風發屋

梁武帝天監六年八月戊戌大風折木承聖三年十一月癸

未帝閱武於南城北風大急普天昏闇

陳文帝天嘉六年七月癸未大風起西南吹倒靈臺候樓太

建十二年六月壬戌大風吹壞皋門中閤十二年九月夜

又風發屋拔樹始興王叔陵專恣之應

後主至德中大風吹倒朱雀門禎明三年六月丁巳大風自

西北激濤水入石頭淮

後齊武成帝河清二年大風三旬乃止

後主天統三年五月大風晝晦發屋拔木 七年三月大風起

西北發屋拔木五日乃止時高阿那瓌駱提婆等專恣之應  
隋文帝開皇二十年十一月京師大風發屋拔木秦隴壓死者  
千餘 仁壽二年西河有人乘騾在道忽為迴風所飄并一  
車上千餘尺乃墜皆碎焉

唐高祖武德二年十二月壬子大風易異為風重異以申命其  
及物也象大君誥命其鼓動於天地間有時飛沙揚塵怒也  
發屋拔木者怒甚也其占大臣專恣而氣盛衆逆同志君行  
蒙暗施於事則皆傷害故常風又飄風入宮闕一日再三若

風聲如雷觸地而起為兵將興

太宗貞觀十四年六月乙酉大風拔木

高宗咸亨四年八月己酉大風落太廟鸛尾 永隆二年七月

雍州大風害稼 弘道元年十二月壬午晦宋州大風拔木

中宗嗣聖元年四月丁巳寧州大風拔木 五年十月辛亥大

風拔木 七年五月丁亥大風拔木 神龍元年三月乙酉

睦州大風拔木崔元暉封博陵郡王也大風折其輅蓋 二

年六月乙亥滑州大風拔木 景龍元年七月郴州大風發

屋折木拔八月宋州大風拔木壞屋舍 二年十月辛亥滑州

暴風發屋 三年三月辛未曹州大風拔木

明皇開元二年六月京師大風發屋大木拔者十七八四年

六月辛未京師陝華大風拔木九年七月丙辰揚州潤州

暴風雨發屋拔木十四年六月戊午大風拔木發屋端門

鷗尾盡落十九年六月乙酉大風拔木二十二年五月

戊子大風拔木天寶十一年五月甲子東京大風拔木

十三年三月辛酉大風拔木

代宗永泰元年三月辛亥大風拔木大歷七年五月乙酉大

風拔木十年五月甲寅大風拔木

德宗貞元元年七月庚子大風拔木六年四月甲申大風雨

八年五月己未暴風發太廟屋瓦毀門闕官署廬舍不可

勝紀 十年六月辛未大風拔木 十四年八月癸未廣州  
大風壞屋覆舟

憲宗元和元年六月丙申大發拔木 三年四月壬申大風毀  
含元殿欄檻二十七間占為兵起 四年十月壬午天有氣  
如煙臭如燔皮日映大風而止 五年三月丙子大風毀崇  
陵上宮衙殿鵠尾及神門戟竿六壞行垣四十間 八年六  
月庚寅京師大風雨毀屋飄瓦人多壓死者丙申富平大風  
拔棗木千餘株 十二年春青州一夕暴風自西北天地晦  
冥空中有若旌旗狀屋瓦上如蹂躪聲有日者占之曰不及  
五年茲地當大殺戮

穆宗長慶二年正月己酉大風霾十月夏州大風飛沙為堆高  
及城堞三年正月丁巳朔大風昏霾終日四年六月庚  
寅大風毀延喜門及景風門

文宗太和八年六月癸未暴風壞長安縣署及經行寺塔九  
年四月辛丑大風拔木萬株隋含元殿四鴟尾拔殿廷樹三  
壞金吾伏舍發城門樓觀內外三十餘所光化門西城十數  
雉壞開成三年正月戊辰大風拔木五年四月甲子大  
風拔木五月壬寅亦如之七年戊寅亦如之

武宗會昌元年三月黔南大風飄瓦

懿宗咸通六年正月絳州大風拔木有十圍者十一月己卯晦



潼關夜中大風山如吼雷河噴石鳴羣鳥亂飛重關傾側十  
二月大風拔木

僖宗乾符五年五月丁酉大風拔木 廣明元年四月甲申京  
師及東都汝州雨雹大風拔木 四年六月乙巳太原大風  
雨拔木千株害稼百里

昭宗光化三年七月乙丑洛州大風發屋拔木 天復二年昇  
州大風發屋飛大木

後漢乾祐三年閏五月癸巳京師西北風暴雨至戴妻門外壞  
營舍瓦木吹鄭門門扉起十餘步落拔大樹數十震死者六  
七人平地水深尺餘

宋太祖乾德二年五月揚州暴風壞軍營舍百區 三年六月  
揚州暴風壞軍營及城上敵棚 開寶二年三月車駕駐太  
原城下大風一夕而止 八年十月廣州颶風起一晝夜雨  
水二丈餘海為之漲飄失舟 九年四月宋州大風壞甲仗  
庫城樓軍營民舍凡四千五百九十六區

太宗太平興國二年六月曹州大風壞濟縣廨及軍營 四年  
八月泗州大風浮梁竹竿鐵索斷華表石柱折 六年九月  
高州大風壞廨宇民舍五百區 七年八月瓊州颶風壞城  
門州署民舍殆盡 八年九月太平軍颶風拔木壞廨宇民  
舍千八十七區 十月雷州颶風壞廩庫民舍七百區 九年

八月、白州颶風壞州廨民舍。端拱二年、京師暴風起、東北塵沙晻日、人不相辨。淳化二年五月、通利軍大風害稼。三年六月丁丑、黑風自西北起、天地晦暝、雷震有頃乃止。先是都下大熱、疫死者衆、及此風至、疾疫遂止。至道二年八月、潮州颶風壞州廨營寨、漂刀魚舟。

真宗咸平元年八月、涪州大風壞城舍。四年八月丙子、京師暴風。景德二年六月甲午、大風吹沙折木。八月、福州海上有颶風、壞屋舍。三年七月丙寅、京師大風。四年三月甲寅夕、京師大風、黃塵蔽日。自大名府歷京畿、害桑稼。唐州尤甚。大中祥符二年四月乙未、大風起、京師西北連日不止。

九月無為軍城北暴風雨晝晦不可辨拔木壞城門營壘民舍壓死千餘人 五年八月京師大風 七年二月戊辰京師大風揚沙礫是日百官習儀恭謝壇有隨仆者 六年六月辛亥京師大風起已位吹沙揚塵 天禧二年正月永州大風發屋拔木數日止 三年五月徐州利國監大風起西南壞舍二百餘區壓死十二人 四年四月大風起西北飛沙折木晝晦數刻止五月乙卯大風起西北有聲折木吹黃塵蔽天按占主陰謀姦邪是秋內侍周懷政坐妖亂伏誅 仁宗天聖六年二月庚辰大風晝晦 九年十二月辛酉大風三日 景祐元年九月甲寅夜漏上風自丑起有聲擺木鳴

除二年六月戊寅平明風自未來占者以為百穀豐衍之  
候康定元年大風晝暝經刻乃復皇祐四年七月丁巳  
大風拔木

神宗熙寧四年二月辛巳京都自濮州至河北旁邊大風異常  
百姓驚恐四月癸亥京師大風霾六年四月北京館陶縣  
里風九年十一月潮州海陽潮陽二縣颶風海潮害民田  
稼十年六月恩州武城縣大風壞縣廨七月温州大風雨  
漂城樓官舍元豐四年六月邕州颶風壞城樓官舍七月  
甲午夜泰州海風作繼以大雨浸州城壞公私廬舍數千間  
又通州靜海縣大風雨毀官私廬舍二千七百六十三楹潤

州丹陽縣大風雨溺居民毀廬舍丹徒縣大風潮飄蕩沿江廬舍損田家五年八月朱崖軍颶風毀廬舍

哲宗元祐八年二月末京師風霾大寒是歲福建兩浙海風駕潮害民田紹聖元年秋蘓湖秀等州海風害民田

欽宗靖康元年正月望夜大風起西北有聲吹沙走石盡明日乃止二月戊申大風起東北揚塵翳空三月己巳夜五更大風乍慢乍急聲如叫怒十一月丁亥犬風發屋折木閏十一月甲寅大風起北方雪繼作積數尺連夜不停二年正月己亥天氣昏曠狂風迅發竟日夜西北陰雲中如有火光二丈餘濶數尺時時見庚戌大風雨二月乙酉大風折木晚尤

甚三月丁酉風霾己亥大風四月庚申朔大風吹石折木卒  
酉北風益甚苦寒

高宗建炎元年二月乙酉大風拔木 紹興二十八年七月壬  
戌平江府大風雨駕潮漂溺數百里壞田廬 三十二年七  
月戊申大風拔木溫州大風壞屋覆舟

孝宗隆興元年浙東西郡國風水傷稼 二年八月大風雨飄  
蕩田廬 乾道二年八月丁亥溫州大風雨駕海潮殺人覆  
舟壞廬舍 五年十月台州大風水壞田廬 八年六月丙  
辰惠州颶風壞艦三十餘時樞密院調廣東經畧司水軍四  
艦覆其三死者百三十餘人 淳熙三年六月大風連日

四年九月明州大風駕潮壞定海新縣海岸七千六百餘丈  
及田廬軍壘六月乙巳夜福州福清縣興化軍大風雨壞官  
舍民居倉庫及海口鎮人多死者 六年十一月鄂州大風  
覆舟溺人甚衆 七年二月江陵府大風焚溺岸舟死者尤  
衆 十年八月辛酉雷州颶風大作駕海潮飄溢殺人林木  
田禾皆折

光宗紹熙二年二月癸酉温州瑞安縣大風仆屋拔木殺人  
四年七月興化軍海風害稼 五年七月乙亥行都大風拔  
木壞舟甚衆紹興府秀州大風駕海潮害稼秋明州颶風駕  
海潮害稼十月甲戌行都大風拔木



寧宗慶元二年六月壬申台州暴風雨駕海潮壞屋田 六年  
夏常風當夏而寒 嘉定二年七月壬辰台州大風雨駕海  
潮壞屋殺人 三年八月癸酉大風連日大木皆拔折禾穗  
墮果實上露禱至於丙子乃息後御史朝陵於紹興府歸奏  
風壞陵殿宮牆六十餘所折陵木三千餘株 六年十二月  
餘姚縣風潮壞海堤亘八鄉 七年正月庚辰江州燈夕黑  
雲暴風暮作郡治游人相踐死於門者二十餘人十一月二  
日甲寅大風 十六年秋大風拔木害稼 十七年秋福州  
颶風大作壞田損稼冬鄂州暴風壞戰艦二百餘壽昌軍壞

戰艦六十餘江州興國軍亦知之

欽定天文正義卷七十六

雲氣占考

雲氣占考

漢昭帝元平元年正月庚子日出時有黑雲狀如焱風亂聚轉出西北東西行轉而西有頃亡占曰有雲如衆風是謂風師法有大兵其後兵起烏孫五將征匈奴二月乙酉群雲如狗赤色長尾三枚夾漢西行

成帝永始二年二月癸未夜東方有赤色大三四圍長二三丈索索如樹南方有大四五圍下行十丈餘皆不至地滅占曰東方客之變氣狀如樹木以此知四方欲動者明年十二月己卯尉氏男子樊並等謀反賊殺太守刼略令丞自稱將軍皆誅死庚子山陽鑠官亡徒蘇令等殺傷吏民取庫兵聚黨

數百人爲大賊踰年經歷郡國四十餘一日有雨氣同時起並見而並令等同月俱發也

哀帝建平元年正月丁未日出時有著天白氣廣如一尺布長十餘丈西南行謹如雷西南行一刻而止名曰天狗傳曰言之不從則有犬禍詩妖到其四年正月二月三月民相驚動謹譱奔走傳行詔籌祠西王母又曰從目人當來十二月白氣出西南從地上至天出參下貫天廁廣如一尺布長十餘丈十餘日去占曰天子有陰病其三年十一月壬子太皇太后詔曰皇帝寬仁孝順奉承聖緒靡有解怠而久病未瘳夙夜惟思殆繼體之君不宜改作春秋大復古其復甘泉泰畤

汾陽后土如故

王莽地皇四年漢兵起南陽至昆陽莽遣王尋王邑將諸郡兵號百萬圍昆陽城數重軍勢甚盛晝有雲氣如壞山墮軍上軍人皆厭所謂營頭之星也占曰營頭之所墮其下覆軍流血三千里時光武將兵救昆陽殺王尋莽軍敗散王邑還長安莽敗俱誅死營頭之變覆軍流血之應也

和帝永元十二年十一月癸酉夜有蒼白氣長三丈起天園東北指軍市見積十日占曰兵起十日期歲明年十一月遼東鮮卑二千餘騎寇右平北十六年四月丁未紫宮中生白氣如粉絮占為喪

順帝永建二年九月戊寅有白氣廣三尺長十丈餘從北落師門南至斗

靈帝熹平二年八月白氣如一匹練衝北斗第四星占白氣衝北斗為大戰明年冬揚州刺史臧旻等攻盜賊斬首數千級  
光和元年六月丁丑有黑氣衝北宮溫明殿東庭中黑如車蓋起奮迅身五色有頭體長十餘丈形貌似龍

晉惠帝永興元年十二月壬寅夜有赤氣亘天殛隱有聲  
二年十月丁丑赤氣見北方東西竟天占曰并為大兵殛有聲怒之象也是後四海雲擾九服交兵  
光熙元年十二月甲申有白氣若虹中中天北下至地夜見五日乃滅占曰大兵

起明年王彌起青徐汲桑亂河北毒流天下

懷帝永嘉三年十二月乙亥有白氣如帶出南北方各二起地至天貫參伐中占曰天下大兵起四年三月司馬越收繆胤等又三方雲擾攻戰不休五年三月司馬越死於寧平城石勒攻破其衆死者十餘萬

愍帝建興元年十月己巳夜有赤氣曜於西北荊州刺史陶侃討杜弼之黨於石城戰敗

宋文帝元嘉三十年正月乙亥朔會羣臣於太極前殿有青黑氣從東南來覆映宮上

陳宣帝太建四年有白氣如虹自北方貫北斗紫宮



北齊後主天統三年五月戊寅夜西北有赤氣竟天夜中始滅  
十月丙午天西北頻有赤氣占曰有大兵大戰後周武帝統  
衆來伐

周武帝天和二年十月辛卯有黑氣一大如杯在日中甲午又  
加一經六日乃滅占曰臣有蔽主之明者六年二月己丑  
夜有蒼雲廣三丈經天自戌加辰

靜帝大象二年六月甲戌有赤氣起西方漸東行徧天

唐太宗貞觀十一年七月一日黃氣竟天大雨穀水溢

中宗景龍元年九月十八日有赤氣竟天其光燭地三日乃止  
肅宗寶應元年七月西北方有赤光亘天貫紫微漸流於東彌

漫北方照耀数十里

德宗貞元二年正月大雨雪平地深尺餘雪上有黃黑色狀如浮埃

敬宗寶曆元年十二月乙酉夜有霧起須臾遍天霧上有赤氣或深或淺久而乃散

懿宗咸通元年十一月丁酉戌時妖星初出如匹練亘空化為雲而沒在楚分

僖宗中和二年七月丙午夜西北有赤氣如絳竟天

昭宗光化二年春有白氣經天如練自西南徹東北而旋

後唐明宗天成二年十二月壬辰酉時西南方有赤氣如火燄

○ 燄約二千里占者云不出二年其下當有大兵

晉高祖天福二年正月二日夜初北方有赤氣西至戌亥地東北至丑地南北潤三丈狀如火光赤氣內見紫微宮及北斗諸星至三點後內有白氣數條次西行至夜半子時方散

宋太祖乾德三年七月己卯夜西方起蒼白氣長五十尺貫天船五車亘井宿占曰主兵動 六年十月己未亘西北起蒼白氣三道長二十尺趨東散占曰游兵之衆

太宗太平興國四年四月己未夜西北有白氣壓北斗 雍熙三年正月己未夜赤氣如城占為兵 四年正月癸酉夜白氣起角亢經太微垣歷軒轅大星至月旁散 端拱元年十

月壬申遲明翼上有雲氣過中天連地濃潤前赤黃後蒼黑色先廣後大行勢如截占曰將領行陣有大克捷十一月戊午夜西北方有赤氣如日脚高二丈至道二年二月丙子夜西北方有蒼白氣長短八道如彗掃稍經天漢參錯如交蛇占曰所見之方主兵勝

真宗咸平三年十月辛亥黑氣貫北斗占曰兵起人疫十二月庚午黑氣長三丈餘貫心宿入天市垣抵帝座久方散四年三月丙申白氣二亘天十月辛亥黑氣貫北斗五年正月白氣如虹貫日久而散七月戊戌白氣如陣貫東井六年四月己巳白氣東西亘天丁丑白氣貫日五月辛亥白氣

出鼎至東壁浹六月辛未赤氣出婁貫天庾占曰倉庫有火  
災丙子白氣出河鼓左右旗分為數道浹七月癸卯白氣如  
彗起西南方占曰有兵喪 景德元年三月白氣貫軒轅蒼  
白氣十餘如布亘天七月辛亥黃氣出壁長五尺餘占曰兵  
出十一月癸丑黑氣十餘道衝日 二年正月丙寅黃白氣  
貫月黑氣環之二月丁亥白氣五道貫北斗占為大風幸臣  
憂十月丙子白氣出閭道西亭亭有光占曰宮中憂 三年  
三月丙辰北方赤氣亘天白氣貫月十月甲午黑氣貫北斗  
魁占曰夷兵起 四年三月己未白氣東西亘天庚申白氣  
出南方長二丈許久而不散四月庚午白氣貫北斗長十丈

占為大風庚寅白氣如布襲月三文許甲午南方有黑氣貫  
心宿長五文許占大水十一月己巳中天有赤氣如掃長七  
尺在輿鬼南占曰秦兵疫 大中祥符元年正月癸亥朔黃  
氣出於艮占曰主五穀熟丁丑白氣二東西亘天七月西北  
方白雲氣如彗帚三十餘條占曰主兵戰 二年九月戊午  
黃氣如柱起東南方長五文許 三年四月丁巳中天有黑  
氣東西亘天占為水十二月癸亥青赤氣貫太微 五年二  
月壬寅白氣長五文出東井貫北斗魁及軒轅占為兵為雷  
雨 七年九月有氣出紫微為宮闕狀光燭地 天禧三年  
四月黃氣如柱貫月占曰女后喜

仁宗天聖七年二月己卯夜蒼黑雲長三十尺貫弧矢翼軫占  
曰荆楚水 明道元年十月庚子夜黃白氣五貫紫微垣十  
二月壬戌西北有蒼白氣亘天 景祐元年八月壬戌夜有  
黃白氣如彗長七尺餘出張翼之上凡三十三日不見 四  
年七月戊申夜黑氣長丈餘出畢宿下 寶元二年正月壬  
子夜蒼黑雲起西北長三十尺漸東南行歷婁胃昂畢及火  
木相次中天而散占曰水災倉穀腐敗邊兵憂若七日有雨  
則不占三月甲寅夜細黑雲起西北方長三十尺貫王良及  
營室占曰衛分大人憂 康定元年三月丙子夜東南方近  
濁黑氣橫亘數丈濶尺許良久散占曰東南有水憂六月壬

子黑氣起心宿西長五十尺首尾侵濁以之散占曰大雨水

二年八月庚辰夜東方有白氣長十尺許在星宿度中至十日長丈餘衝天相居星宿大星南九十餘日沒壬午夜黑氣起西南長七丈貫危宿羽林入濁至天津良久散癸卯夜蒼白雲起西北濶二尺首尾至濁良久散占曰其下有兵

慶應二年八月甲申白雲貫北斗十一月壬申黑氣貫北斗柄三年正月戊戌中天有白氣長二十尺向西南行貫日占曰邊兵憂四月癸卯白氣二生西北隅上中天首尾至濁東南行良久散占曰其下有兵寇七日有大風雨則不占七



月戊辰夜西南生黑氣長三丈許經天而散占曰雨水八月  
壬子夜白氣貫北斗魁 四年五月甲子夜黑氣起東北方  
近濁長五丈許良久散占曰大雨水宜治津梁九月辛巳夜  
中天有白氣長二丈許貫卷舌南河東北行少頃散占曰風  
雨之候十一月甲子夜蒼白雲起南近濁久方散占曰南方  
有兵寇七日有大風雨則散 八年正月丁酉夜黑氣生首  
尾至濁漸東行久之不散占曰水災二月辛卯夜西方近濁  
生黑氣長三丈許良久散占曰水災 皇祐四年十一月壬  
寅夜黑氣生東方南北至濁貫參宿軒轅占曰主邊境有火  
憂辛酉夜白氣起北方近濁長五丈許歷北斗久之散占曰  
多大風

英宗治平元年六月戊午夜蒼白雲起東北方長一丈許貫畢  
占云有兵禍 二年二月乙未夜蒼黑雲起西北方長五丈  
許貫東井及北斗良久散占曰大水民疾病四月癸巳夜蒼  
黑雲起西北方長三十尺西至軒轅太民北抵鉤陳占曰雨  
水後宮有疾病之憂丙午夜西北方有白氣漸東南行首尾  
至濁貫角宿移西北久方散占曰有兵戰疾疫事九月庚申  
夜西北蒼黑雲長三丈許貫營室壘壁陣及天河占曰土功  
興及雨水 三年六月丁未夜東方有蒼白雲長一丈許貫  
畢占曰歲不收亦陰雨之候 四年二月癸巳夜蒼白雲起  
南方長三丈濶尺貫南門星主兵出閤三月辛巳蒼黑雲起

南方丙首至濁濶尺貫尾箕斗牛庫樓騎官主陰雨五月戊寅夜蒼黑雲起北方長三丈濶尺貫紫微垣王良主蕃國有暴兵及奉車官憂壬寅夜蒼黑雲起北方長三丈濶尺貫紫微垣主暴兵六月癸亥夜白雲起東北方長五丈上濶下狹貫天船閣道傳舍紫微垣天樞主畜夫過賊亦為雨候八月乙亥夜黑雲起西北方長丈濶尺貫北斗主陰雨十月庚申夜黃氣一上下貫月中主女主憂十二月庚戌夜蒼黑雲起南方長三丈濶二尺貫五車東井五諸侯

神宗熙寧元年正月乙酉夜蒼白雲起西南方長四丈濶尺貫月及河南鬼軒轅主秦分暴兵六月己酉夜蒼黑雲起北方

長二丈濶尺貫北斗魁東貫文昌主三公疾民憂十月庚申  
夜蒼黑雲起北方東西兩首至濁貫織女天棓紫微垣北斗  
魁主暴兵三日有雨則解二年四月甲辰夜蒼白雲起東  
南方長二丈濶尺貫天市垣主人多疾疫七月甲申日下有  
五色雲十一月每夕有赤氣見西北隅如火至人定乃滅  
三年二月庚辰夜蒼黑雲起西北方長三丈濶二尺貫王良  
扶筐天廚四年六月己未夜蒼黑雲起西北方長丈濶尺  
貫五車又起西北方長丈餘貫北斗魁文昌主大臣憂五  
年七月丁亥夜白雲起南方長丈貫房心六年五月庚  
申夜蒼黑雲起東北方長五丈濶二尺貫雲雨閣道七年

三月壬子蒼白雲起西南長二丈濶尺貫日經中天過白氣如帶主兵四月壬申夜蒼白雲起北方長五丈濶二尺貫北斗魁鉤陳王良閣道東至奎六月辛未夜蒼黑雲起天河中長五丈南北兩首至濁貫尾箕又蒼黑雲起東方長五丈貫羽林軍外屏丙戌夜蒼白雲起南方長二丈貫危室壁及八魁主齊衛分憂或土功木壬辰夜蒼白雲起西北方長二丈貫天棓紫微垣主分爭與刑罰藏兵禦難備非常又主牛畜多死七月庚戌夜蒼白雲起東方長丈餘貫參旗及參宜察臣下八年二月己巳夜蒼黑雲起東方長三丈貫心天市垣列肆宗星主物貴五月癸亥夜蒼黑雲起西方長三丈貫

軒轅太微垣五帝座主諸侯憂十月庚子夜黑雲起西北方  
長三丈貫畢大陵鉤星 九年四月庚寅夜白氣長丈起東  
北方天市垣辛亥夜蒼黑雲起南方長二丈貫庫樓騎官積  
卒心尾主憂六月乙未蒼白雲起東北方長四丈貫室壁閣  
道主兵憂七月己卯夜蒼黑雲起南方長四丈貫軍市天園  
主兵十月乙酉夜蒼黑雲起西北方長四丈貫北斗鉤車府  
主雨 十年六月癸未夜蒼黑雲起南方長三丈濶尺貫鼈  
鼈天淵主多雨水七月丙子夜蒼黑雲起北方長丈貫北斗  
魁主民憂貴臣獄或多雨八月庚辰蒼黑雲起東北方長二  
丈貫參井北河五諸侯主諸侯憂或大水九月庚申夜蒼黑

氣起北方由北斗魁杓貫紫微垣至天樞 元豐二年四月  
戊申夜白雲起南方長三丈貫庫樓積卒龍尾主將死或大  
臣黜 五年四月壬申夜蒼白雲起北方長三丈出太微垣  
貫五帝座陳常主人主大喜 八年七月庚申夜蒼黑雲生  
北方長三丈濶尺貫北斗文昌天樞主三日內有雨及大臣  
黜

哲宗元祐三年七月戊辰夜東北方近濁天明照地如月將出  
漸偏西北有白氣經天主兵宜防西北二鄙 紹聖二年十  
一月桂陽監慶雲見 元符二年九月戊辰夜赤氣起北方  
紫微垣北斗星東南次有白氣十道各長五尺主兵及大臣

黜

徽宗崇寧元年十一月己酉赤氣隨日沒主大旱外及有告急

二年五月戊子夜蒼白氣起東南方長三文貫尾箕斗主  
蠻夷入貢舊臣來歸 政和元年十一月甲戌夜蒼白氣起

紫微垣貫四輔主相凶 五年四月庚子有白雲自北直徹

中天漸成五色如華蓋 七年五月乙卯夜赤雲白氣起東

北方主大旱民飢喪 宣和元年六月辛巳夜赤氣起北方

半天如火 二年二月戊戌夜赤雲起東北漸向西北入紫

微垣 三年九月壬午夜蒼白氣長三文貫月主其下有亂

者 四年九月丁丑西方日下有赤氣 七年四月壬子夜



有赤雲入紫微垣主兵起

欽宗靖康元年正月丁丑夜赤白氣起西方主所向兵至九月  
戊寅有赤氣隨日出十一月己丑日下有赤氣閏十一月丁  
酉赤氣亘天 二年正月己亥夜西北陰雲中有火長二丈  
餘濶數尺時時見二月壬午夜白雲如虹自南亘北漸移西  
南至東北三月戊子夜白氣貫斗

高宗建炎元年八月壬申東北方有赤氣 四年五月壬子赤  
雲亘天中有白氣十餘道貫之如練起於紫微垣犯北斗及  
文昌由東南而散占兵大起又所向兵至宮中有喪 紹興  
元年二月己巳白氣亘天占有暴兵 七年十一月癸卯有

赤雲如火隨日入 八年九月甲申正北方有赤氣如火影

二十七年二月乙酉赤氣出紫微垣 三十年二月壬申

西北方正北方東北方一帶約五處赤氣如火影十一月甲  
午西南方白氣自尾宿歷壁宿婁宿昴宿止十二月戊申夜  
白氣出尾宿歷心房氏亢角宿入天市貫太微至部位止有  
類天漢白氣主兵明年亮大入寇 三十一年十二月辛丑  
白氣自斗歷牛女虛

孝宗隆興元年十二月壬午白氣自危宿歷室壁婁胃昴宿

二年正月甲寅白氣自壁宿歷奎婁昴畢觜參 乾道元年  
正月庚午夜白氣出奎漸上經婁胃昴畢入參占主殺伐

主邊城三月戊辰夜白氣自參宿至角宿與天漢相接其白  
氣約廣七丈四月丁酉夜蒼白氣自西北漸上東北入天市  
垣辛丑入北斗魁中乙巳入紫微垣內至天極天樞中十一  
月丙寅白氣出女厯虛危室壁上奎婁胃昂宿十二月庚午  
白氣亘天六年十月庚午赤氣隨日出占氣如火隨日出  
者軍行有兵憂十一月丁丑赤氣隨日入占有告急者或檄  
天下召兵不行七年六月壬寅十月戊午赤氣隨日八年  
十一月乙巳赤氣隨日入丙午赤氣隨日出占君側有佞  
臣九年十月壬申日出前東方并日入後西方有雲氣若  
烟非烟若雲非雲青赤黃三色光潤占凡氣有三色名曰商

雲見則國有慶乃人君修德而致 淳熙三年八月丁酉赤氣隨日沒戊戌赤氣隨日出 十年正月戊子西南有白氣如天漢而明南北廣六丈東西亘天占有兵起 十四年十一月甲寅赤氣隨日入

光宗紹熙四年十一月甲戌夜赤雲白雲見占赤雲如火影見者如疋帛天下多兵 二年六月壬寅白氣如帶道亘天已酉亦然喪之象也

寧宗慶元四年八月庚辰赤氣如帶亘天占有暴兵 五年二月癸酉夜白氣如帶道亘天 嘉泰四年二月庚申赤氣亘天次月臨安大火十一月壬申白氣如帶道亘天占有暴兵

嘉定六年十月乙卯有赤氣隨日出十一月辛卯有赤氣隨日入

理宗端平元年正月辛丑鄂州江陵府副都統制孟珙攻蔡州見黑氣壓城上嘉熙四年二月丙辰白氣亘天淳祐二年四月甲寅亦如之景定元年三月白氣如匹練亘天三年七月甲申夜白氣亘天如匹布

度宗咸淳三年襄陽城中白氣自西而出十年正月乙卯朔永清有氣如虹橫貫一邑

帝昺祥興二年二月癸未有黑氣出屋山西是日太傅樞密副使張世傑與元師戰兵潰

遼太祖神冊二年六月乙巳幽州城中有氣如烟火狀

景宗保寧五年四月丙申白氣晝見

道宗壽隆七年正月壬戌朔夜白氣如練自天而降黑雲起於  
西山疾飛有聲北有青赤黑白氣相雜而落

金海天德二年十二月乙卯慶雲見狀如鸞鳳五彩 正隆六

年十月丙午慶雲見

世宗大定七年潤七月己卯午刻慶雲環日八月辛亥午刻復  
如之二十三年十月己未慶雲見於日側

昌宗明昌三年十二月丙辰北方微有赤氣

章宗泰和五年九月戊子戌時西方北方間黑雲間有赤氣如

火次及西南正南東南方皆赤中有白氣貫徹乍隱乍見既而為雨隨作風至二更初黑雲間赤氣復起於西北方及正西正東東北往來遊曳內有白氣數道時復出沒其赤氣又滿中天約四更皆散 六年正月北京申龍山縣西見有雲結成車牛行帳之狀或如前後摧損之勢晦日乃散九月乙酉夜將曙北方有赤白氣數道歷王良下徐州至北斗開陽<sup>之東</sup>搖光而散

衛紹王大安元年四月壬申北方有黑氣如大道東西竟天至五更散 三年三月辛酉辰刻北方有黑氣如堤內有白氣<sup>似</sup>龍虎之狀 至寧元年紫雲覆彰德城上數日

宣宗貞祐元年十月丙午夜有白氣三衝紫微而不貫十二月  
丙申白氣東西竟天移時散 三年六月戊申夜有黑氣廣  
如大道自東南至於西北其長竟天 興定三年七月庚申  
五色雲見十月乙丑平涼府慶雲見遣官驗實以告太廟詔  
國中 五年正月山東行省蒙古綱奏慶雲見命圖以進六  
月戊寅日將出有氣如大道經丑未厯虛危東西不見首尾  
移時沒十二月己丑北方有白氣廣三尺餘東西亘天 元  
光元年十月丁未東北有赤雲如火

哀宗正大二年二月甲寅有黃黑稜 三年三月庚午省前有  
氣微黃自東北亘西南其狀如虹中有白物十餘往來飛翔



又有光條見如二星移時方滅

四年六月丙辰有白氣經

天

元世祖中統二年正月辛未夜東北赤氣照人大如席

順帝至正十三年冬袁州路每日暮有黑氣環繞郡城 十四

年十二月辛卯絳州北方有紅氣如火蔽天 十八年三月

辛丑大同路夜黑氣蔽西方有聲如雷少頃東北方有雲如

火交射中天遍地俱見火空中有兵戈之聲 二十一年七

月己巳忻州西北有赤氣蔽天如血八月癸未彰德西北夜

有紅氣亘天至明方息乙酉大同路北方夜有赤氣蔽天移

時方散十月癸巳絳州有赤氣見北方如火 二十二年京

師有白氣如小索起危宿長五百丈掃太微二十三年三月  
壬戌大同路夜有赤氣亘天中侵北斗六月丁巳絳州日暮  
有紅光見於北方如火中有黑氣相雜庚申平陽路有白氣  
三道一貫北極一貫北斗一貫天漢至夜分方滅八月丙辰  
沂州有赤氣亘天中有白色如蛇形徐徐西行至夜分乃滅  
十月丙申朔青齊一方赤氣千里二十六年三月丁亥有  
氣橫貫東南良久始滅二十七年五月丙子朔大名路有  
白氣二道亘天二十八年七月癸酉京城紅氣滿空如火  
照人自旦至辰方息乙亥京城黑氣起百步內不見人從寅  
至巳方息

明太祖洪武四年四月辛丑丑五色雲見戊申己酉及十一月  
壬戌并如之五年正月庚午丙子六月辛己七月己酉壬子  
八月己亥并如之六年五月乙巳慶雲見六月丁丑五色  
雲見七月癸卯亦如之七年四月丙午五月丙戌癸己甲午  
六月乙未乙卯七月己卯八月辛酉十月丙午并如之七  
年冬十月廣州黑氣亘天八年正月壬申五色雲見四月  
丁未五月庚午癸未六月壬辰己亥十月庚戌及九年八月  
癸己並如之十四年正月黑氣亘天九月甲申五色雲見  
十一月甲申黑氣亘天十五年正月甲申五色雲見五月  
庚申九月乙卯丙寅十一月辛酉十八年四月癸己乙未五

月辛未甲申六月癸丑十九年九月壬午二十年十一月丁亥並如之二十一年二月己卯黑氣亘天三月壬午白雲貫暈及太陰五月乙酉五色雲見七月丙戌黑氣亘天二十七年六月己卯五色雲見

惠帝建文二年十月丙辰夜有白氣二道自東北指西南

成祖永樂元年六月甲寅日下五色雲見八月壬申日珥隨五色雲見八年二月庚戌車駕次永安甸日下五色雲見

十一年六月戊申朔武當山頂五色雲見十七年九月丙辰慶雲見十二月癸未亦如之二十一年八月甲子泰嶽太和山頂金殿現五色圓光紫雲周匝逾時不散二十二

年十一月丙戌月下五色雲見

仁宗洪熙元年二月癸酉庚辰三月乙未俱五色雲見六月中  
天有白氣東西竟天

宣宗宣德元年二月戊子北方黑氣東西亘天六月癸未夜有  
蒼白氣東西竟天七月乙未夜中天生蒼白雲廣二尺餘東  
西竟天八月癸酉昏刻中天有青氣三道長如匹練東南行  
甲戌東南有白氣一道如決堤戊寅昏刻中天有青雲狀如  
杵南有黑雲狀如覆船庚辰東南有白氣狀如羣羊驚走既  
滅有黑氣狀如死蛇頃之分為二辛巳駐蹕樂安城中有黑  
氣如死灰東南天有青氣狀如人叉手揖拜九月丁未日上

五色雲見十一月丙辰北方有蒼白雲東西竟天丁巳中天  
有黑雲一道貫北斗南北竟天二年三月辛卯昏刻南方  
有蒼白雲一道起天圜東掃翼軫十月戊寅日未出有紅雲  
一道起正東濁西南行十一月乙未日下五色雲見三年  
十月癸巳曉月生五色雲四年六月戊子夜亦如之五年  
閏十二月戊午夜北方生蒼白雲長三文餘六年三月壬  
子昏西方有蒼白雲南北竟天七年六月壬辰日入後有  
青霞二道東西竟天十年三月丁亥月生五色雲  
英宗正統元年八月丁卯夜有黑氣二道東西竟天九月辛亥  
未刻黑氣一道兩旁色蒼白濶二文餘自西南屬東北亘天

十月己丑日生五色雲十二月癸亥如之 二年六月癸酉  
日入後東南有蒼白雲一道東西約長十丈餘七月庚子月  
生五色雲八月甲申北方黑氣東西亘天 三年七月己亥  
夜中天有蒼白雲南北竟天貫南北斗十月癸丑夜北方有  
黑雲氣一道東西約長十餘丈濶三尺餘 四年八月丙戌  
夜東北方有黑雲一道約長二丈濶五尺辛丑夜東方有黑  
雲濶二丈南北亘天十月戊戌夜有白雲一道東西約長十  
餘丈 六年七月戊戌五色雲見於西方 七年四月戊戌  
月生五色雲 八年十月辛卯昏刻天中有黑氣南北亘天  
十一月戊辰夜東南方有蒼白雲東西亘天 九年十月丙

午夜五鼓北方有黑氣長十餘丈濶五尺餘離地逾三尺餘  
徐徐北行十一月甲午月生五色雲 十年八月癸亥日生  
五色雲九月丁酉亦如之 十一年二月辛酉有異氣現華  
蓋殿金頂及奉天殿鵲吻之上 十四年七月癸卯夜有黑  
雲一道濶二尺餘離地一丈餘南北亘天徐徐北行八月庚  
戌有黑雲如傘蓋十月庚申晝生蒼白雲復化為三東西南  
北竟天壬戌夜西南有黑氣如火烟須臾化蒼白氣六道徐  
徐北行壬申日初出東方有黑雲五道中高兩頭銳而杲日  
上黑雲如烟尋發紅光散焰如火

景帝景泰元年閏正月癸酉酉刻西方有氣上黃下黑非雲非



霧蔽天掩日更盡方散甲戌南方生蒼白雲一道濶二尺餘  
離地十丈許徐徐西南行須臾漫如烟霧蔽天二月戊寅平  
旦日上有雲氣如烟火散漫己卯西方生黑氣如之壬午日  
上黑氣四道約長三丈離地丈許兩頭銳而貫日其狀如魚  
壬寅夜黑氣南北亘天三月戊辰正西有赤黃雲數十段須  
臾散漫如火有光照耀四月甲戌西北黑雲如堤南北亘天  
五月丁未東方赤雲如火西北黑雲長十丈餘濶一丈徐徐  
南行六月乙酉日出赤雲四道兩頭銳如耕墾狀徐徐東北  
行而散八月甲戌黑雲如山化作龍虎狀夜有雲氣形如麋  
鹿驚奔俱南行九月辛酉夜黑雲數丈橫貫北斗魁蒼白雲

三道東西亘天丙寅有蒼白雲氣南北亘天十月辛未西南  
黑氣如烟火南北亘天二年四月庚辰有黑氣如烟摩地  
而上甲午西方有黑氣如烟霧摩地而生徐徐南行六月戊  
寅日上五色雲九月辛酉夜蒼白雲三東西竟天三年正  
月癸亥東南有黑雲如人戴笠北向而揖四年十一月丁  
卯月生五色雲

英宗天順元年六月甲辰北方有黑氣濶而且厚如山林烟火  
狀二年十月己巳南京日入後西南有赤氣如火影壬申  
月生五色雲十二月甲子夜正北火影中見赤氣一道濶二  
尺餘直衝天中長五十餘丈其形上銳狀如立鐮三年十

二月甲戌夜南方火影中見赤氣濶二尺餘長十丈餘其形  
上銳如立 四年八月乙丑西北有黑氣摩地而生徐徐南  
行十月戊午月生五色雲 五年七月己亥朔夕東方有黑  
氣須臾蔽天十月乙亥昏刻正西有赤雲長三丈餘濶倍之  
去地三文兩頭銳徐向西南行 七年三月己亥晝夜游氣  
不開天色慘白昏蒙十月戊申蒼白雲一道長二十餘丈東  
西橫貫天棓天廚星

憲宗成化二年三月辛未白雲起南方東西竟天 五年三月  
癸卯月生五色雲暈 八年三月庚子黑氣起西北臨清德  
州晝晦四月甲午西方有黑氣至邳漸散 十一年正月丙

寅月生五色雲。十二年十二月己卯夜西北方有赤氣衝天，長五丈許，狀如矛鋒。二十一年閏四月壬辰，開濮二州清豐金鄉未申時，黑雲起西北，化為五色，須臾晦如夜。

孝宗弘治元年六月癸巳朔，襄陽市有黑氣如霧，恍如人形，觸人小兒中之立死。二年正月辛巳日生五色雲。八月甲辰西方有赤氣，南北橫天。五年二月己巳，北方黑氣東西亘天。十二月辛亥夜，東方有白氣，南北亘天，長十餘丈，去地五丈。六年八月壬申，南京有黑氣，東西百餘丈。十年二月丙申，修武黑氣入地，化為石，狀如羊角。十四年三月己酉朔，日生五色雲。十六年二月庚子，宜良黑氣迷空，咫尺莫

辨人形、十八年五月庚寅、雲籠三殿、雲端若有人騎龍上  
升者、人多見之、十月庚午、五色雲見、

武宗正德元年正月乙酉夜、崇明空中有紅光、曳尾如虹、起東  
北、至西南、沒聲如雷、辛丑、鳳陽紅光發、與日同色、聲如雷、三  
月戊申夜、太原有火光、大如斗、墜寧化王府、空中見紅光如  
彎弓、長六七尺、旋變黃、又變白、漸長至二十餘丈、光芒亘天、  
十二月庚戌、青州有氣如龍、色紅黃、久之變青、白而散、二  
年八月己亥、赤光見寧夏、長五丈、六年正月壬子朔、清河  
乾圩、黑氣突起、俄而雷雨大作、忽明忽晦、至巳刻、氣如炎暑、  
九年十一月癸酉、山西襄陵西南、白氣如二帚、移時散、

十二年閏十二月丁丑夜瑞州東方有紅氣變白形如曲尺  
中外二氣黑相闕者久之

世宗嘉靖元年十二月武城縣西城樓角南有孔出白氣如烟  
七日乃止 七年四月河間有氣如火光龍形自空至地直  
立於西南數刻方散十月萬州白氣如虹自西直入天河凡  
十九夜方滅十二月望白氣亘天津 十七年九月戊子日  
生五色雲 十八年二月庚子朔當午日下有五色雲見長  
徑二丈餘形如龍鳳

穆宗隆慶二年四月甲申萬全都司空中有赤黑二雲聞 六  
年正月庚申夜北方有赤氣如火光良久漸散

神宗萬曆五年六月庚辰祥雲繞月

九年十月丙申慶雲見

於宜陽靄結如蓋歷已盡午方散

十年二月癸卯甘肅赤

白雲氣見

十九年二月丁丑甘肅涼州有白氣貫月五月

己丑天降白氣一道

二十四年七月丁丑白氣貫月三

十五年正月庚午黑氣蔽天

三十七年二月壬戌夜白雲

氣一道濶二丈餘如匹練從巽至乾穿氐宿入太微垣及北  
河并宿良久乃散八月甲戌點白氣亘天

光宗泰昌元年九月戊戌有赤氣映天如赭

熹宗天啟四年六月癸巳午刻南方五色雲見

六年六月朔

山陰東方五色雲見閏六月己未夜北方有蒼白雲氣出紫

微垣內經勾陳入螭蛇天津河鼓從坎至巽良久乃散

愍帝崇禎元年三月太湖縣雲成五色有樓閣狀 七年正月

遍天五色氣如環大小不一踰時方滅 十一年六月黑氣

冲天 十二年二月壬申濬縣有黑黃雲起旋分為二頃之

四塞狂風大作黃埃漲天間以青白氣五步之外不辨人踪

至昏始定 十六年二月初五日大內諸殿脊及各門樓丹

井若炊烟而微淡久乃息十月將祭宗廟由簿已設忽黑氣

自空而墜如有婦人衣白者疾飛入宮 十七年四月四日

都城內外黑氣蒙隱不散皇極殿作白色



欽定天文正義卷七十七

虹霓占考

## 虹霓占考

陳宣帝太建十二年二月壬寅白虹見西方占曰有喪

周武帝建德四年十月癸亥帝率衆攻晉州是日虹見晉州城上首向南尾入紫宮長十丈餘庚午克之丁卯夜白虹見長十餘丈頭在南尾入紫宮中占曰天下兵戰流血又曰若無兵必有大喪至六年正月平齊

唐高祖武德初隋將堯君素守蒲州有白虹下城中

高宗永隆元年六月戊子虹蜺亘天

肅宗至德二年正月丙子南陽夜有白虹四上亘百餘丈  
憲宗元和十三年十二月丙辰有白虹濶五尺東西亘天

武宗會昌四年正月己酉西方有白虹

懿宗咸通元年七月己酉朔白虹橫亘西方 九年七月戊戌

白虹橫亘西方

昭宗光啟二年九月白虹見西方十月壬辰夜如之 天復三

年三月庚申有曲虹在日西北

晉高祖天福九年正月乙未大霧中二白虹相偶四月庚戌大

霧中有蒼白二虹

末帝開運元年正月乙未大霧中有白虹相偶

周太祖廣順元年十一月甲子白虹竟天

宋高宗建炎四年三月辛亥白虹貫日京房易傳曰蜺者旁氣

也白蜺蜺出日中茲謂擅陽 紹興八年二月辛巳日中有  
白虹亘天 二十七年二月壬寅白虹貫日 三十年十二  
月辛酉曲虹見日之西占曰虹蜺陰陽交錯之氣曲虹冬見  
異之尤甚也

孝宗乾道三年十月丙申虹出非時 淳熙元年十月戊寅曲  
虹見日之東 二年十月庚辰虹生非時 五年十月丁巳  
曲虹見日之東

寧宗慶元元年正月丙辰白虹貫日 嘉泰三年七月壬午亦  
如之 四年十一月虹生非時 嘉定十一年二月丙辰白

虹貫日

理宗嘉熙三年十月乙丑虹見四年二月辛丑白虹貫日  
淳祐十年十二月丁巳虹見寶祐五年十月甲午亦如之

遼聖宗統和二十年正月癸丑東方五色虹見

金海陵天德二年正月甲辰白虹貫日十一月丙戌及三年正  
月丁酉亦如之

世宗大定二十九年正月乙卯白虹貫日亘天二月乙丑白虹  
亘天

宣宗興定三年十一月癸丑白虹二夾月尋復貫之

哀宗正大四年十一月乙未日上有虹背而向外者二約長丈  
餘兩旁俱有白虹貫之

元世祖至元二十四年七月癸丑白虹貫日武宗至大三年正月丁亥八月甲寅並如之

泰定帝泰定元年夏温州虹見九頭色如血四年二月辛卯

白虹貫日

文宗至順元年九月癸巳白虹貫日二年正月己酉亦如之

三年五月丁酉白虹並日出長竟天

順帝至元三年正月丁巳白虹貫日八月癸未亦如之四年

八月丁丑京師白虹貫天五年正月丙寅白虹貫日至

正十九年九月丙午夜白虹貫天二十三年六月丁巳絳

州有白虹二道衝斗牛間 二十五年三月壬戌白虹貫日

二十六年三月丁亥白虹五道亘天其第三道貫日又氣

橫貫東南良久乃滅 二十八年閏七月壬戌白虹貫日乙

丑冀寧汶水縣有白虹貫日自東北直繞西南雲影中似日

非日如鏡者三色青白踰時方沒

明太祖洪武九年六月丁酉白虹見 十年二月己巳白虹貫

八月癸亥夜白虹見九月甲辰白虹貫日

日十二月甲子白虹貫月 十四年正月壬子白虹貫日十

五年正月丁未十六年正月戊申並如之 十九年三月己

巳夜白虹貫月 二十二年十二月戊午白虹貫日 二十

三年正月壬辰白虹貫日珥 二十八年十一月乙亥白虹

貫日珥已而彌天貫日 三十年二月辛亥白虹亘天貫日

成祖永樂十八年閏正月癸未白虹貫日珥

仁宗洪熙元年正月乙未白虹貫日珥四月丁未並如之

宣宗宣德元年二月己卯白虹貫月珥四月癸未夜西方有虹  
一道蒼白鮮明 二年十二月甲戌白虹貫月珥 五年四

月庚辰白虹貫日珥 十年十二月辛亥白虹貫日珥

英宗正統元年二月己酉白虹貫月九月丁未十二月丙戌並  
如之 二年七月壬寅夜北方生白虹一道兩頭至地 三

年四月庚辰白虹貫日珥十二月癸酉白虹貫月珥 七年

十二月辛丑白虹貫月暈 十一年正月乙未白虹彌天

十四年正月辛卯白虹貫月八月戊申東北生虹蜺形如杵



景帝景泰二年正月癸卯白虹貫日珥 三年正月丙辰日生  
白虹 五年十一月壬戌白虹貫月右珥 七年九月丁丑  
夜北方白虹見首尾指地

英宗天順元年二月庚戌白虹貫日辛亥白虹貫日彌天者竟  
日 二年二月乙卯白虹貫日七月戊申白虹見東方直起  
上銳長十餘丈

憲宗成化三年七月癸酉東北生白虹兩頭自地出良久散  
二十年二月己未日生白虹東北亘天

孝宗弘治二年正月甲戌白虹彌天丙戌如之四年二月庚戌  
復如之 八年七月甲午夜京師北方白虹見色蒼白 九

年三月乙酉白虹貫日彌天十一年十二月庚申亦如之  
十三年二月己亥白虹彌天十七年二月癸丑十八年二月  
己巳夜及正德元年正月乙酉十二月辛酉甲子並如之  
世宗嘉靖元年二月丙戌白虹彌天七年正月乙亥亦如之

八年十月饒平白虹見於西南三夜象如刀十三年二月  
壬辰白虹亘天十八年十二月壬午立春亦如之四十年  
五月晦日將曉赤虹二自西北經東南亘天四十一年十  
一月辛丑白虹彌天四十三年六月黑虹見北方

穆宗隆慶五年三月辛巳白虹亘天

神宗萬曆四十六年七月海州見白虹貫日四十八年二月

癸丑、白虹彌天

熹宗天啟元年二月甲午、白虹彌天

三年三月、白虹貫日

愍帝崇禎八年二月丙午、白虹貫日、十一月及十年二月並如之、十二年正月五日、東南有白虹、十七年八月、義烏中  
天虹見、兩頭開了、